



ル 5
3150
13



門 儿 5  
號 3150  
卷 13

黔南識略卷十九

銅仁府

貴州巡撫長白愛必達撰

銅仁府在省城東六百六十里禹貢荊州南境漢為武陵郡隋為沅陵郡唐初為辰州地垂拱二年分辰州麻陽縣地置錦州盧陽郡宋屬思州元置銅仁大小江等處軍民長官司隸思州安撫司明洪武五年改置銅仁長官司屬思州宣慰司永樂十一年置銅仁府領銅仁省溪提省大萬山四長官司置烏羅府隸貴州布政司正統三年烏羅府廢地均屬銅仁府

黔南識略卷十九

國朝因之領銅仁一縣附郭舊設松桃同知屬府嘉慶二年以烏羅平溪二司地撥歸廳轄改爲直隸同知設知府一教授一巡檢一轄于貴東道其境東至湖南鳳凰廳亭子關界四十里西至思南府安化縣苗旺纏溪寨界一百八十里南至思州府黃道司下溪白菓樹寨界七十里北至松桃廳馬腦營寨界五十里東南至湖南沅州府麻陽縣小坡張家寨界六十里西南至思州府田埂坪高樓坪寨界七十里東北至湖南鳳凰廳茶園沙坪寨界五十里西北至思南府安化縣沙壩場小壘寨界九十里廣一百七十里

表二百七十里至

京師七千二百里辰沅之要隘思石之門戶也城周九里三分計一千二百九十九丈五尺登以石門四康熙九年重建乾隆二十八年修城之東爲東山嶙峋崎峭俯瞰江流絕壁鐫有雲彩江聲四大字舊有大觀樓久廢今建雙峰閣于上又五里爲石笏山天乙山在城東南一里有石屹立山色赤則有火災明參議蔡潮題其峰曰天乙知府魏文相鑿池山麓以厭之席帽山在城南二里天馬山在城南五里雲銜霞轡有蹠蹠行空之概曠袍山在城南二里玉屏山

在城南三十里大萬山在城南二百里縣屬萬山司前舊產硃砂又司北五里有新坑山巖谷幽邃可以避兵三台山在城西三里三峰羅列相接者爲半月山又有諸葛山在城西十里形勢突兀俯瞰諸垵上有武侯屯營故址百丈山在城西百里層障山在城西一百二十里上有石門泉從門出五雲山在城西省溪司常出五色雲故名磴山在提溪司東二里獅子鳳山在城北三里將軍山在城北六十里舊名獅子山梵淨山在城西二百里跨銅仁松桃思南石阡諸界下小上大土名飯甌山又名月鏡山峰巒峭別分

爲九支中湧一峰周圍僅數丈突兀峭絕其高千仞中如斧劃麓締而巔連劃處隔五六尺許名曰金刀峽峽有飛橋相接左右皆立梵宇廣闊可容數十人寺側有石曰說法臺陟者攀鐵絙以上下蹈空而行寺在極頂風峭不可瓦治以鐵至其巔千里風烟可一覽而盡也山旁石出如筍者數四有拜佛臺香爐山棉絮巖煉丹臺藏經巖有井曰定心井寒沁肌骨清鑿毛髮山後有池曰九龍池潭而不流淨無片草相傳有辟支佛遺迹下有九十九溪紆折環繞不獨黔中之勝概亦宇內壯觀也雙貴峰在城南十里以

兩峰並峙而名正人峰在城西三里原名岑障又名  
文筆洞明督學沈思充題曰正人峰有倡和詩勒于  
石上洞崖在城西南隅當大小兩江合流處壁立千  
仞下有洲隱水中明參議蔡潮建跨鰲亭于崖上傳  
元時有漁人沒江底得三銅人挽而出之郡之得名  
以此石人崖在城西十五里縣屬扣答鄉仙人崖在  
城北縣屬桃映鄉石筍一高丈餘上有賽金石寬丈  
餘斜罩其上黃蠟洞在城東五里又東五里有滴水  
洞又城北四十里有川江洞皆深邃仙女洞在省溪  
西北銅仁江又曰大江源出松桃廳屬烏羅司西南

之九龍山東南流逕省溪提溪二司界又東至銅崖  
小江水入焉有渡曰雙江渡遶城東南又東入湖南  
麻陽縣界逕錦州故寨謂之錦水又逕麻陽縣東北  
龍門山下至辰溪縣合沅江小江源出梵淨山有九  
十九溪最大者爲甕濟洞各溪合甕濟水南流至城  
西南入大江洪亮吉水道考據漢志辰陽縣三山谷  
辰水所出南入沅江行七百里水經注沅水又  
東逕辰陽縣南東合辰水水出縣三山谷辰水東南  
流獨母水注之水源南出縣龍門歷獨母溪北入辰  
水以銅仁大江謂卽辰水小江謂卽獨母水按方輿

紀要辰水源出湖廣辰州府沅陵縣三嵎山西南流  
至辰溪縣界入沅江一名辰溪辰溪縣南十里有辰  
溪蓋自沅陵西南流入沅江也郡縣以水得名由來  
久矣今水道考以九龍山爲三山谷又云三山谷今  
谷名梵淨山甕濟洞及北山卽古之龍門山鑿空之  
論難以徵實矣提溪在城南提溪司西五里源出司  
西三十里之濫泥山入銅仁江印江在提溪司東一  
里流合提溪宙羅江在省溪司北卽省溪明史石邦  
憲傳賊欲攻石阡不克還過省溪卽此源出司北九  
十里江頭山其水無旱潦迅湍急溜一如常時不似

他水時起時落也又司北七里有雲舍泉司前溪在  
縣屬大萬山司源出大萬山東北流入銅仁江亞寨  
堡在城東北六十里明宣德七年總兵蕭綬征叛苗  
設亞寨等十堡是也方輿紀要地架及小橋亞寨與  
麻陽縣之鴉刺關爲三省接連處戍守最切鴉刺守  
則銅信溪小坡水草壩水打田石羊頭等處隘兵可  
以不用亞寨守則毛口砦石子壩黃蠟灘白水洞等  
處隘兵可以不用地架守則孟溪堡平南關冠帶河  
翁絞固龍干寨張家寨四十八旗提溪省溪等處隘  
兵可以不必全用地架亞砦不守則張家毛口翁絞

諸處防禦最切矣烏泥營在城西北又名烏業營又名烏略營是也天生砦在城西北一百二十里明正德八年官軍討叛苗入天生砦固絕蠻洞水逆賊平今其地有天生橋東北有龍勢關黑檀隘東南有施溪漾頭關北有倒馬關清水塘又六龍山之蠟鷺崖省邊司之黑菁俱係要隘學額十二名建有銅江書院義學一駐劄協副將一員都司一員守備二員分防一員千總四員分防二員把總九員分防八員外委十三員分防十員額外七員分防二員制兵一千七百一十名內分哨沙子坳貓兒崖菴堂坡夥哨

營四堡每堡設礮十座原額戶口民苗洞蠻二萬九千一百二十四戶自嘉慶十九年至道光三年新增戶一百六十六戶共二萬九千二百九十戶實在有徵丁差銀八十五兩五錢有奇改徵米石供支兵糧秋米丁銀于嘉慶三年善後案內題定改徵米三千三百六十五石八斗有奇供支兵糧府額貯常平穀三萬零二石八斗有奇嘉慶六年至道光三年捐輸穀二十八石應存社倉穀九十六石樹饒桐茶黃蠟黃楊之屬產葛布箭竹稅口二一在東門外一在省溪江口額徵正稅銀六百七十二兩轄四土司省溪

長官司在城西百里本元省溪壩場等處長官司明  
洪武五年改置今司授楊正德爲正長官省溪副長  
官宋時戴子美以功授鎮遠土知州明洪武五年改  
授副長官提溪長官司在城西一百四十里本元提  
溪長官司明洪武五年授楊秀爲正長官以張秉仁  
副之今並承襲無印苗多吳龍石麻白五姓皆係紅  
苗餘與各郡同

論曰府屬與諸郡縣交錯之區非苗蠻之窟穴卽防  
禦之要衝也故其幅員狹宿重兵焉地架亞砦二處  
又爲諸隘中之要隘方輿紀要言之詳矣嘉慶初逆

苗石柳鄧及白老寅等先後煽動大兵深入旋卽掃  
除雖蜂屯螿聚何足勞我熊羆究其取戾之由實亦  
受愚於漢奸非盡其性好仇殺也鷹以饑而思攫鹿  
以死而走險蚩蚩者類然況苗乎查漢民之黠者多  
來自江右抱布貿絲游歷苗寨始則貸其贏餘而厚  
取其息繼則準折其土地廬舍以爲值苗亦猶夫人  
耳至並其衣食而盡奪之幾何不起而爲寇也若夫  
與苗漸狎而詭爲苗語苗裝以通姻者俗謂之變苗  
實則亂民也律之所誅莫此爲甚黔中自道光七年  
清查苗寨後明立科條此輩方知裹足然必官不辭



勞而後可以永逸蓋民苗雖分實則皆我

皇上之赤子多爲其防正所以籌其安語曰塞水不自其源必復流此亦治苗之源也後此者其鑒諸

銅仁縣

銅仁縣附郭漢爲辰陽縣地唐爲常豐涇陽二縣地屬錦州元置銅仁大小江等處蠻夷軍民長官司隸思州安撫司明洪武五年改置銅仁長官司屬思州宣慰司永樂十二年置府治于此萬歷二十六年改爲縣

國朝因之設知縣一改正大營巡檢爲縣丞教諭一訓

導一典史一其境東至思州府界三十里西至四川酉陽州界二百八十里南至思州府界五十里北至湖南永綏廳界一百三十里東南至思州府界八十里西南至思南府界一百九十里東北至湖南鎮筵鎮界七十五里西北至湖南永綏廳界一百七十里廣一百七十里袤二百七十里縣轄十一鄉曰坪茶鄉曰長坪鄉扣蒼鄉萬山鄉壩盤鄉木抱鄉客寨鄉龍魚鄉益蒼鄉桃映鄉坡頭鄉內有大小二江近水者有蛟患遠水者又虞亢旱計成熟田二萬九千一百五十六畝有奇實在有徵丁差銀一百零八兩有

黔南識略卷十九  
奇改徵米石撥支兵糧地丁等銀一千九百九十兩  
四錢三分二釐應改徵米石銀一千九百八十七兩  
八錢九分二釐一百二十六寨戶口共一萬五千三  
百三十五戶學額八名縣丞分駐正大營係松桃同  
知地方舊有大萬山長官司在城西南萬山鄉本元  
大萬山蘇葛辨等處軍民長官司屬思州安撫司洪  
武初改名屬思州宣撫司永樂十二年屬銅仁府後  
廢舊產硃砂形如箭鏃者號箭頭砂最爲可貴產于  
萬山廠他砂皆產于土中此砂獨產于石夾縫中取  
之難每塊無重至一兩者場市五渡口九餘俱詳

府志

黔南識略卷十九終

黔南識略卷二十

貴州巡撫長白愛必達撰

松桃直隸同知

松桃廳在省城東北八百四十五里禹貢荊州南境漢爲武陵郡隋爲沅陵郡唐置錦州盧陽郡宋併入沅州麻陽縣元爲思州宣慰司地明永樂十一年置銅仁府並置烏羅府領朗溪蠻夷長官司烏羅荅意治平頭著可四長官司正統三年府廢屬銅仁府朗溪改屬思南府隸貴州布政司

國朝康熙四十三年平紅苗設正大營以同知駐其地

雍正八年平松桃紅苗建城于松桃山下移同知駐焉轄坡東坡西新疆此松桃所由名也乾隆二年城移于蓼皋山下在故城南十里嘉慶二年討松桃苗匪平後乃以松桃廳直隸貴東道益以銅仁府平頭烏羅二司地設直隸同知專轄焉增設經歷一員撥府學訓導爲廳學訓導六年又設石峴衛千總一員操練屯兵守護城池皆爲同知屬官特設松桃協鎮副將一員所屬自遊擊以下凡五十四員原設駐劄松桃之銅仁協鎮副將並其屬官皆移于銅仁府所以備犄角而蓄威重也城外有銅仁府所轄屬官三

員分駐廳屬地方銅仁縣丞一員駐正大營城管沙子坳構皮大興諸汛銅仁府巡檢一員駐磐石營管芭茅有泥康金諸汛銅仁府烏平司吏目一員駐平頭司城管烏平二司巡檢于道光十二年裁其境東至湖南鳳凰廳有泥寨界四十里西至思南府界牌坳界一百三十五里南至銅仁縣馬頸塘界八十五里北之東首抵湖南永綏廳茶洞西首抵四川秀山縣洪安汛三省連界計一百里東南至湖南鳳凰廳龍團寨界七十五里西南至銅仁府關平壩界一百八十里東北至湖南永綏廳河岸界四十五里西北

黑西諸田卷二十一  
三里卽抵四川秀山縣界過界百四十里復入廳界  
六十里再抵四川酉陽州關子門河共計二百一十  
里至

京師七千二百里外有所轄之地孤懸于思南石阡  
兩府之間俗名插花地凡九處廳之西南五百六十  
里爲平貴外洞陸曲外洞東北斜長五十里南北三  
十里界思州鎮遠施秉思南石阡銅仁府等處西南  
二百八十里爲黃羊壩長五里橫半里界思南印江  
西南三百七十里爲督陀洞縱橫十里西南四百一  
十里爲豆麻洞俱界思南安化婺川西南四百三十

里爲寬平洞縱橫十二里界思南安化龍泉西四百  
一十里爲大保洞縱橫六里界思南婺川龍泉安化  
西四百七十里爲小溪縱橫四里界思南婺川安化  
西四百一十里爲卜居洞縱橫二十里界思南安化  
龍泉西四百五十里爲黑水縱橫十二里界思南安  
化四川酉陽州廳城舊係土築雍正十二年建原在  
松桃山下地甚狹隘乾隆二年改建磚城于蓼皋山  
下周二里計五百丈門四正大營盤石營平頭司木  
樹汎芭茅汎石峴衛各建有城境內諸山自銅仁府  
梵淨山蟬聯而來至廳城西南一百八十里最稱高

大劈分二支北一支由烏羅司故城北至石梁麻兔關子諸洞東轉入四川秀山縣界行百餘里復入廳界結松桃廳城又北下百餘里仍入秀山縣界在烏羅一帶有得勝坡油奔波及關子洞諸山亦稱險峻而近城數十里多土山勢皆平坦其南一支由廳屬之江口洞東北歷地佃舉賢諸洞行一百二十餘里至廳屬石峴衛則山勢陡高自此而東北爲芭蕉坪爲石榴坡爲涼亭坳爲有泥堡山爲盤石汎山爲芭蕉汎山爲隴統堡山過螺螄壩又東北直趨湖南永綏廳治境內坡東坡西卽以此坡分界高六七八里

不等連亘一百五六十里寬十餘里峰峻路狹最稱天險其次則來龍坡由磐石汎山分支自北而南趨正大營之東至大興汎止計五六十里險峻亞于涼亭坳前者逆苗多據此以自固平苗後分汎設碉特于此二坡加詳也南北二山之間中通一水向無定名木耳溪源出城西南烏羅司山洞中下流有九十九折亦名九十九渡水東至孟溪場會廳屬大路河卽也江也也江源出也江硎烏羅溪羊溪二水東南來注之又東至秀山縣之兩河口有水由石峴衛之懷恩綏甯兩堡發源北會四十八溪之水出平頭司

又東北來注之又東北爲牛角河在秀山縣界又東北逕廳東郭外乃入廳界又北則廳之護城河入焉河源出秀山縣之龍泉山在廳西北四十里東南流逕廳城西折而東與本耳溪合逕廳城北又北流歷落塘石花潮水晚森諸汎入湖南永綏廳界會秀山縣之白河出辰州入沅水其水通小舟上抵孟溪艾門而止銅仁江在城西南九十里源出烏羅司西之九龍山山高百丈下分九支卽梵淨山之上支也由寨音場南流逕銅仁歷麻陽至辰溪入沅水小舟亦可行外此則無水路矣蓼臬山在城內飛雲山在城

東南十五里岩巖聳立上有梵宇俯視城郭村寨如數指紋秋螺山在城北里許山類螺形大河經其前山頂建迴瀾閣水色山光竹樹掩映士民多遊覽焉森巖山在城南平頭司林木蔚鬱望之如雲石梁山在城西南烏羅司山石橫亘如梁又東有琴閣山木降山迎虹山在烏羅司高出羣峰朝旭初昇山光四映又有雲朶山木干坡在烏羅司治旁官道經其下俯視羣山蒼翠森列又司西南三里有觀音圍崖壁峻峭卓然天險上有三洞可容五百人司西南三十里又有萬勝磴亦有洞可容百人苗亂土人恆借此

以避兵又平頭司前有甘梗泉源出石隙中分流爲  
二一清一濁取其清者釀酒味甚美油蓬堡在城西  
六十五里油蓬洞地方方輿紀要平頭司孤懸苗界  
地最廣饒賦役出辦居多與烏羅朗溪及四川之邑  
梅司接壤守禦最切而油蓬堡苗羊坪冠帶河皆置  
戍處也嘉靖中議者以孟溪堡偏守一隅宜遷于油  
蓬堡乃烏平二司適中處且可與四十八旗相應援  
云又冠帶河堡在平頭司西南苗犯思石此爲必由  
之道孟溪堡在城西六十里今爲孟溪場方輿紀要  
宋置龍泉葛泉長官司于此元因之明初置堡又小

橋堡接四川酉陽平茶司境亦苗蠻出入之衝也南  
門外護城河有橋曰鎮固橋長七丈過橋卽秀山縣  
地東門外曰永安橋長六丈東郭外水塘爲晉省大  
路水寬不可以橋設渡船牛角河亦設渡船南由八  
十里之大興場通銅仁府北由六十里之長興堡通  
永綏廳西由六十里之孟溪場西南由一百二十里  
之烏羅司通思南府廳處萬山之中地勢窪下氣候  
甚暖與銅仁府同平頭司亦然正大營烏羅司則寒  
暖適中惟石峴涼亭坳磐石營一帶山高風勁氣候  
獨寒田畝大抵近水地平者田多腴山高水少者田



多瘠地暖則穀熟旱地寒則熟遲廳舊轄坡東坡西  
改直隸廳後並管烏羅平頭二司地方計成熟田二  
萬二百三十畝有奇徵銀各案則例起科不等共應  
徵馬丁烟正雜項耗羨等銀一千五百一兩五分有  
奇後經... 每銀九錢改徵米一石共徵米一千六  
十七石... 四升有奇又徵秋糧米二百五十石一  
斗二升有奇耗米三十七石五斗一升有奇又坡東  
坡西新墾成熟旱田一千三百六十二畝有奇每畝  
徵銀二分連正耗共徵銀三十一兩三錢二分有奇  
照前數改徵米三十四石八斗一升有奇又坡東坡

西苗民認納有土無畝正耗粟米一百一石七斗八  
升有奇以上總共徵米二千九十二石八斗有奇閏  
月加徵改折米八十一石五升有奇改折耗米十二  
石一斗五升有奇正耗共加徵米九十三石二斗一  
升有奇皆畱支松桃協各汛兵米及廩米二項其不  
敷者銅仁府輓運米一千三百一十八石二斗六升  
銅仁縣輓運米三千九百九十五石六斗六升每年  
採買米五百石照中米市價赴糧道庫請領嘉慶元  
年討平逆苗石柳鄧入官逆產一十八畝七分三釐  
有奇每年租穀三十三石五斗七升有奇照中米變

價銀二十二兩有奇又入官逆產魚塘園田土二十  
一畝有奇佃種雜糧每年租銀六兩八錢四分一釐  
俱解藩庫境內設十九堡建一百一十一碇卡嘉慶  
八年前同知將磐石汎之馬廠廢地捐置牛種器具  
招佃墾種歲收租穀八十六石一斗十四年同知鄭  
錕捐貲招佃墾種大塘壩得兩汎營盤官荒地基二  
處歲收租穀五十二石捐買黑子塘弩矢坡大鉛廠  
三處田歲收租穀二十一石共計每年收租穀一百  
五十九石一斗變價修各碇堡不敷者同知捐辦城  
外官田房租每年徵銀三十一兩二錢支水塘河牛

角河四處渡夫工食銀十二兩餘銀十九兩二錢申  
解藩庫此外別無稅課廳屬山多田少承平日久生  
齒漸繁地力已無餘利穀有粘穀晚穀糯穀之分米  
賤每官斗價銀一錢二分米貴遞增斗米值價銀一  
錢至二錢不等米價昂貴甲于黔省歲稍歉卽不敷  
民食樹有杉松白蠟之屬間有種桑養家蠶者係苗  
婦爲之亦甚稀少向有鉛礦旋開旋閉舊產鐵因苗  
疆嚴禁開採戶口自城內外及坡東坡西烏羅平頭  
二司共計漢民三萬八千三百一十一戶男婦大小  
計一十二萬二千七十四名編三百七十三甲計三

千八百七牌坡東坡西平頭司石峴衛共計苗民三百七十二寨計四千四百四十八戶大小男婦計二萬一千二十一名寨頭三百六十二名額設土弁一百七十九名通事土百戶二十八名通事土寨長四十四名乾隆中記廳屬苗寨三百五十共五千九百九戶計今減去戶口四分之一蓋經苗變兵燹之餘故遜于前云廳城內無苗民坡東坡西苗多漢少石峴漢苗各半平頭司苗少漢多自振武汛以西凡烏羅司地方皆無苗民學校設自嘉慶二年學額文武生各四名不分民苗增廩生各二名四年出歲貢一

名拔貢尙未定額生童皆赴鎮遠府隨棚院試營制自嘉慶二年新設松桃協鎮副將一員轄左右二營左營中軍都司一員兼司軍裝器械糧餉手總二員把總二員外委三員額外外委四員兵丁三百九十三名皆駐城內左營木樹城汛守備一員把總一員額外外委二員兵丁二百二十名左營石峴城汛守備一員把總一員外委一員額外外委一員兵丁二百名左營大塘堡汛千總一員兵丁八十名左營落塘堡汛外委一員兵丁五十八名左營壩得堡汛外委一員兵丁六十三名左營麥地堡汛外委一員兵

丁五十一名左營振武堡汎外委一員兵丁五十三名左營太平堡汎外委一員兵丁五十七名左營石花堡汎千總一員額外外委一員兵丁九十六名設礮卡一十二座左營潮水堡汎把總一員額外外委一員兵丁八十名設礮卡十座左營八樓堡汎外委一員兵丁六十五名設礮卡九座左營晚森堡汎外委一員兵丁六十五名設礮卡八座左營涼坳汎把總一員兵丁五十名裁崖坳汎弁兵移駐于此各汎惟此處無城堡而山高路狹最爲要地右營磐石城汎遊擊一員千總一員外委一員額外外委一員兵

丁三百名設礮卡三座右營芭茅城汎守備一員兼司軍裝器械糧餉把總一員額外外委一員兵丁一百二十名設礮卡五座右營長坪堡汎外委一員兵丁六十六名設礮卡七座右營康金堡汎外委一員兵丁四十六名設礮卡三座右營有泥堡汎把總一員額外外委二員兵丁七十八名設礮卡十座右營磐古達堡汎額外外委二員兵丁八十名設礮卡八座右營隴統堡汎外委一員兵丁六十四名設礮卡八座右營岱東堡汎千總一員額外外委一員兵丁一百名設礮卡五座右營牛心堡汎外委一員兵丁

六十四名設礮卡八座右營桿子坳堡汎把總一員  
兵丁九十六名設礮卡十一座右營太平茶堡汎把  
總一員兵丁七十六名礮卡自城東南長坪汎起北  
至晚森汎止凡十四汎計八十里設礮卡一百一十  
一座南接銅仁府北接湖南永綏廳百里之中頃刻  
可達皆嘉慶二年平苗後所設也又新設石峴衛千  
總一員嘉慶六年平定逆苗白老寅于石峴汎築城  
增設衛千總及屯軍四百名城四面設八堡曰得勝  
曰久安曰太平曰綏甯曰懷恩曰西溪曰大營曰茶  
園每堡屯兵五十名內立總旗一人三堡立百戶一

人管東各兵每堡設礮卡十共八十座逆苗等田土  
入官分給屯兵每名水田四畝山土一幅用代糧餉  
共水田一千六百畝外餘水田二百一十二畝又旱  
田四百九十八畝歸衛官管理佃種收穀代廉俸役  
食等項並為歲修礮堡之資有餘之穀變價收貯備  
用道光六年石峴大水沖制屯田二十九畝衛官田  
一百四十三畝又撥衛官田二十九畝補給屯軍衛  
官水田止餘四十畝不敷廉俸等項之需現已籌款  
支給屯田皆臨河八年築堤以防水患沖制各田可  
望漸次修復衛千總督率屯兵三時力田一時講武

黑商諸冊卷二十一  
各卡輪流巡警爲西南一帶地方衛護松桃與銅仁  
地方分界文職以廳南八十五里銅仁之馬頸塘爲  
界武職以廳南五十五里銅仁之官舟塘爲界故分  
防正大營城汛守備千總把總額外委各一員分  
防大興汛把總一員分防沙子坳堡汛把總一員分  
防貓兒崖堡汛外委一員分防菴堂坡堡汛外委一  
員分防夥哨堡汛把總一員分防構皮堡汛外委一  
員一城六堡地屬松桃而汛地弁兵則轄于銅仁協  
此外仍有借松桃協地安營者二處銅仁協分防石  
峴汛外委一員借駐松桃之平頭司湖南鎮筵鎮分

防營守備一員衛守備一員借駐松桃之螺螄壩因  
地制宜互相控制所以備苗之法至詳且盡廳境向  
爲紅苗巢穴界連黔楚蜀三省謂之三不管地叛服  
不常由來久矣康熙四十二年雍正八年乾隆初年  
屢討紅苗乾隆十七年則白玉保二十四年則白老  
求四十七年則勾布涼水苗人苗匪踵起爲逆頻煩  
師旅六十年松桃逆苗石柳鄧糾結楚苗爲亂嘉慶  
元年乃討平之六年三月松桃逆苗白老寅叛于石  
峴四月討平之蓋紅苗性最獷悍貪而無親負恃其  
衆憑依險阻又處三省連界之地控制尤難嘉慶二

年改直隸廳益以烏羅平頭二司幅員既廣防禦尤  
周轄土司四烏羅正長官唐時楊通孫以功授烏羅  
司正長官現承襲有印烏羅副長官自唐時冉安昌  
傳至冉應孫明永樂時授烏羅司副長官平頭正長  
官明洪武時楊正德以功授平頭司正長官平頭副  
長官唐時田惟定以功授平頭司副長官現均承襲  
無印專司捕緝勾攝約束漢民坡東坡西地方新設  
苗守備七名苗千總二十四名苗把總五十名苗外  
委九十八名共一百七十九名又設通事土百戶二  
十八名土寨長四十四名皆嘉慶二年增設城市鄉

場蜀楚江西商民居多年久便爲土著衣冠粧飾不  
尚華美飲食多粗糲近城男子半充兵役婦人不甚  
習女工鄉民勤儉力田之外栽桐茶諸樹及種包穀  
番薯等物男女共之貿易以趕場爲期場多客民各  
立客總以約束之場以五日爲期工匠不務淫巧惟  
鍛鐵之工例禁不準入苗寨而苗民有以善鍛世其  
家者尤宜嚴禁苗民以吳龍石麻白五姓爲多白姓  
多居銅仁松桃則以田姓易白姓爲苗民五大族餘  
則有唐賀楊歐諸姓又有漢人變于苗者曰變苗嘉  
慶元年平苗匪男苗皆雜髮衣帽悉仿漢人惟項帶

銀圈一二圍亦多不留鬚者女苗頭必裹布耳帶大環項帶銀圈自一二圍以至十餘圍不等上著窄袖短衣鑲花邊下著摺裙無中衣不裹足近城女苗間學漢人綉飾苗語難解而通漢語者亦眾弗通者則借通事傳語苗民讀書者少務農者多亦作工術藝惟不習商賈女苗習耕種勤紡織養家蠶織板絲絹及花布錦以爲業婚姻喪葬與漢人漸同秋收後則禱神還願祈福各寨延巫師跳端公聚族宰牛宴飲爲樂或延至二三日不止喪以遺衣服裝死者像擊鼓歌舞名曰調彭置產貸銀皆用契券狡者亦或僞

造昔所稱五月寅日避鬼恐致虎傷之說則已不聞大抵紅苗性最剽悍重財輕命知禮義者少雀鼠微嫌睚眦小怨輒聚眾持械一日成仇累世不忘名爲打冤家又或捉人弔打勒錢以贖惟不捉歐婦人懼與其母家爲仇黠苗相商往往以婦人先相爭者多以喫血解或因本人喫血難憑則指名其親族某人喫血盟誓名爲點血延巫請神以監之大則宰牛狗小則用雞貓喫血後永無反復苗俗尙鬼故也近年來頗知畏法惡俗漸更而餘風猶未盡泯又苗地多瘠苗民嗜利而無遠慮好飲酒宴會罄所入以供之



不知積儲漢奸因以重財盤剝算其宅園田土以償  
債苗日以貧則或偷竊度日或窩賊分贓自道光七  
年清查苗寨後漢人不敢當買苗民田宅苗寨頗稱  
安靜惟點苗亦或自盤剝其同類則在隨時查禁苗  
民得免于凍餒庶可久安長治云

論曰昔之議苗疆者首重古州八萬今則以松桃爲  
最要古州輿衍阻深在吾腹裏環之者皆黔中郡邑  
稍有萌芽力能禁禦且向化日久安于耕鑿可編冊  
而稽也松桃遠懸一隅介荆蜀之極邊紅苗種類黠  
于他苗試準挾鏢捉白放黑誠有如舊志所云者其

巢穴又延蔓于三省之交稍失其馭將彼此有震隣  
之虞我

朝康熙四十七年以後凡七勞鞭箠矣故其設營伍嚴  
斥堠視他處爲特周焉廳先僅轄坡東坡西嗣益以  
烏羅平頭二司地其要會險塞處近皆城堡林立碉  
卡星羅此呼而彼應百里之中食頃卽達誰敢有豕  
突鳴張膏我戈矛者雖然防患以法而立法以人官  
惟明也而後可以嚴將惟勤也而後可以勇訟獄無  
擾以吏胥而後可以使之服訓練必汰其老弱而後  
可以使之威役以緝匪不可以通匪兵以詰奸不可

黔南識略卷二十一  
以養奸鎮之以靜神之以動雖飛鳴亦懷我好音也  
豈不存乎人哉

黔南識略卷二十一終

